

QUÆSTIO MEDICA,

QUOD LIBETARIIS DISPUTATIONIBUS,
manè discutienda in Scholis Medicorum,
die Jovis vigesimâ-quintâ Novembris.

M. MICHAËLE PICHONNAT,
Doctore, consiliario, Medico Regis, Præsîde.

An Medico evidentior Dei Existentia?

I.

DEUM à Medico suspici rem raram qui dicit, is Christiani nomine indignus est. Medicus quam qui maxime Deum novit: qui Deum novit, is colit. Nulla scientia melius ad Dei cognitionem conducit quam medicina, tota hæc divina, licet naturalis. In operibus naturæ nonne Deus est? In corporis structura, in circuitu sanguinis, in musculari cordis motu, in semine fœtum recludente, quid nisi divinum? Spirituum impulsus velox, jugis liquorum secretio, humorum, fermentorumque vires acidæ, his contrariæ, sulphuræ, oleaginosæ, salinæ, insipidæ, illarumque commixtarum varii effectus, si leges naturæ sectantur, quidni & decreta Dei? In sensibus externis, quos octo credas; in conversione alimentorum in chylum à chyli reliquiis, chyli in sanguinem, à sanguine; In nutritione partium à diversis, disparibusque cruoris particulis extra vasa positis; in spontanea stercoreis nullo alio adjuvante exclusione; in improbo exitu recrementorum sanguinis per poros; in ortu hominis, ejusdemque occasu, licet Medicus naturam accuset, potius edepol miratur Numen Optimum Maximum. Quid tum? ordinem omnium etiam minutularum corporis partium ad vitam animalis unâ simul concurrentium quis disposuit? An fors, an casus, an ars humana? minime gentium: quis igitur? Deus.

NATURA, cui omnia credere Medici dicuntur, nihil aliud est, præter materiam certo modo dispositam, configuratam & motam. Materiam ex se inertem nemo est qui ignoret, negetve configurationem & motum aliunde derivari. Illud patebit si coctionem & generationem consideraverimus. Coctio sic instituitur. Alimenta in ore attrita, in ventriculum impulsione deturbata, non attractione pelfecta, fermento acido tam ex reliquiis ciborum orto, quàm isti parti affixo, in minimas dividuntur particulas, ad principia reducuntur, agitanturque tamdiu, quamdiu in liquorem lacteum fuerint conversa. Quam tunc alimenta recipiunt partium configurationem, quem præ se ferunt colorem, sibi vindicare nequeunt; fermento accepta referant necesse est. Fermentum constat particulis acidis, acuminatis, & motis: motum non sibi dedit, sed ab anima accepit fermentum. Generatio debetur permixtis in utero utriusque sexûs seminibus. Semen è subtilioribus, spiritus vocant, crassioribusque particulis componitur. Spiritus sola motûs lege partes crassiores ad loca destinata propulsant, ut viscera, tegumenta, ossa compingantur, cæteraque unde corpus humanum. Hanc dispositionem & figuram non corpus, sed spirituum motus fecit; motum non sibi imperiâre spiritus, sed illis præbuit anima.

I I I.

PER animam homo sentit, loco moyetur, cogitat, intelligit, judicat, discurrit. Illa materialis, vel quid à materia diversum. Materialis non est: materia sentire, cogitare, intelligere, judicare nequit nec discurrere. Quamvis autem spiritalis sit & materiei prorsus expers, nec esse sibi dedit, nec est ab omni ævo, imò creata est. Quod nam autem ens spiritalem illam substantiam creavit? Prima omnium causa, Deus. Proh hominum fidem! quæ disciplina ad numinis notitiam ducit patentiori viâ atque faciliori? quæ scientia omnipotentis existentiam magis declarat? profectò nulla usquam est. Jurisprudencia leges tantum docet humanas; Theologia solummodò supponit Deum; Physica Dei quidem existentiam conjicit; sola Medicina palam facit.

I V.

IN singulis hujus universi corporibus elucescit divini autoris sapientia. Hæc in animalium corporibus præsertim admiranda,

3

quæ quanta in iis sit, nisi ab Anatomes imperitis negari nequit. Nemo homo anatomix plus studet quam Medicus; nemo igitur homo melius novit divinam in homine fabricando solertiam. Quis hanc propius speculatur? Medici est omnes corporis humani partes, fere dicam miracula investigare, monstrare. Aperit ne corpus humanum? ea inspicit, quæ nullis opificum ausis concedunt. Rimatur ille profundorum musculorum tendines, sublimium chordas per medium corpus perforantes; detegit ille trochleæ speciem ad maxillam inferiorem deorsum trahendam, ex musculo os hyoides sursum lateraliter movente, diagastrico constructam; exhibet ille oculum vere microcosmi miraculum. Hunc fodi, quot partes! quam delicatæ! quam variæ! quam admirabiliter ad suos fines dispositæ! Hæ figura, numero, positu egregium ostentant artis opus. Nec minorem arguit artem pupillæ parvitas, amplissimorum objectorum spectra admittens. Quam prudens, quam solers hujus instrumenti opifex! diversas & minimas partes tam affabrè disposuit, ut de rerum amplitudine, de locorum intervallo in quantulacunque retina depictis, certum ferat anima iudicium. Quis oculorum usum animo contemplatus est? quis mirificam oculi structuram oculis hausit suis, numinis admiratione non obstupefactus? In hoc videndi instrumento cæteris sensibus artificiosiori & excellentiori mirum quantum luceat Dei præpotentis majestas. Ex hoc uno prodit veritas etiam non quæsitæ; scilicet hujus numinis nutu quo ingens diversarum partium artificiosè contextarum apparatus ad unam actionem dirigitur totus; eodem diversos & ordinatos syderum motus, varias tempestates, telluris marisque divitias, aeris animabilis spirabilisque naturam, discordem contrariorum corporum concordiam, ad salutem omnium conservacionemque mirabiliter produci atque administrari.

V.

AD Σόφω illius Δημουρβωδ vim admirabilem prædicandam maxime facit corpus humanum non verbo, sed familiari Dei manu concinnatum. Habent Medici illud contemplationis artisque suæ fundamentum, in quo Deum vident, & (dicam si verbis audacia detur) quasi manibus ipsis attrectant. Iniquus igitur erga Medicos iudex, qui temere contendit hujus professores curvas habere in terram animas cælestiumque inanes; qui hanc artem vilipendit, cujus quæstus maximus est, quam maxime servire homi-

num commodis. Vetus illud sanè est Medicinam id habere commune cum bonis Principibus, ut bene faciat & male audiat. Verum ab iis tantum despecta est, qui animum non advertunt ad ejus parentem Deum Opt. Max. cujus summo munere ad sublevandas calamitates hominibus data est. Hæc sola auxiliares admover manus, ubi non aris acervus & auri ægroto domini deduxit corpore febres. Ægri quidem non omnes convalescunt: consule Ciceronem; idcirco non est ars nulla medicina. Si omnia fecit Medicus ut sanaret, peregit partes suas. Plutarcho Tiberius Cæsar dixisse videtur arrogantius cum pronuntiavit, ridiculum hominem esse, qui usu rerum doctus manum Medico porrigeret: vixisset hac ætate Plutarchus eadem reprehensione non notaret Ludovicum Magnum cunctis Cæsaribus majorem, qui medicos respicit, tuetur, fovet. Et quidem medicina potentissimi Regis delitiæ per honorificis ab ipso titulis cohonestatur. Quis igitur jam medicinam impetat? Hæc Poëtæ, Rhetores, Philosophos defensores habet; tutorem Maximum Regem agnoscit; Deumque ipsum & parentem & patrum sibi arrogat: Et quidem Deus non solum medicinam de terra creavit; verum etiam jussit ne opera Medici ut pote necessaria à sapiente discederent. Quæ igitur ars fumos antiquitatis viros, Reges ipsos in suas trahit partes; quæ Deum ipsum parentem habet; illa certè ad Dei cognitionem necessariò deducit. Sed si Philosophis & Medicis perspectum est discrimen quod intercedit inter τὸ εἶναι & τὸ χρυσοῦν divini Platonis; illud certè discrimen maximè notum est Medicis, Dei in servandis hominibus famulis, & ministris.

Ergo Medico evidentior Dei existentia.

Domini Doctores disputaturi.

M. Philippus Ignatius Sæve.

*M. Petrus Marais, rei
herbaria Professor.*

M. Dionysius Dédart.

M. Petrus Ioannes Burette.

M. Carolus Contugi.

M. Dionysius Puyson.

M. Ludovicus de Vaux.

M. Franciscus Vernage.

M. Raphaël Maurin.

Proponebat Parisiis JOANNES BAPTISTA CHOMEL, Parisinus,
Baccalaureus Medicus. A. R. S. H. 1694.

Apud Franciscum Muguet, Regis & Facultatis Medicinæ Typographum.